

Manifiesto institucional con motivo do 25 de novembro, Día internacional da Eliminación da Violencia contra as mulleres

25/11/2022

A Asemblea Xeral das Nacións Unidas, ante a violencia que se exercía contra as mulleres polo só feito de sérmolo, decidiu, en 1999, declarar o 25 de novembro como Día Internacional da Eliminación da Violencia contra as Mulleres. Por iso, neste día, queremos ratificar, desde o Concello de Santiago de Compostela, o noso compromiso de seguir traballando conxuntamente visibilizando, concienciando e rexeitando a violencia machista, ata a súa erradicación.

A violencia contra as mulleres supón a manifestación máis extrema da desigualdade que existe entre homes e mulleres, como o maior obstáculo para o desenvolvemento dunha sociedade xusta e igualitaria.

Todos os grupos aquí presentes compartimos a dor e o sufrimento de tantas e tantas mulleres que sofren violencia, así como dos seus fillos e fillas e da súa familia. A tristura e indignación que sentimos esténdese a toda a sociedade, porque a violencia machista é hoxe a gran ferida da sociedade do século XXI, que só se pode curar con máis igualdade.

No que levamos de ano, 38 mulleres foron asasinadas no Estado Español a mans das súas parellas ou ex-parellas. Desde o 1 de xaneiro de 2003, cando comezou a contabilidade oficial, o número de mulleres vítimas de crimes machistas é de 1.171.

A estes datos hai que sumar 19 asasinatos machistas fóra do ámbito da parella e/ou exparella, correspondentes ao primeiro semestre de 2022. Con esta contabilización dase cumprimento ao Convenio de Istambul sobre prevención e loita contra a violencia contra as mulleres, e aténdese unha demanda histórica do movemento feminista: que nos rexistros oficiais do Estado se contem tamén casos como o de Jéssica Méndez, a moza de 29 anos do municipio pontevedrés de Barro, que asasinada por un veciño, que cargou o seu coche contra ela no pasado mes de marzo, e que agora é oficialmente recoñecida como vítima da violencia machista.

E aínda que as estatísticas oficiais non o recollan temos que lembrar hoxe que houbo outra muller en Galicia que perdeu a vida nas últimas semanas en Vigo a mans dun veciño, no que podemos considerar como un feminicidio social.

En resumo, no que levamos de 2022 as cifras son moi alarmantes: 57 mulleres foron asasinadas polas violencias machistas. A cifra de menores orfos e orfas ascende xa a 26. E un menor foi asasinado por violencia vicaria, segundo o conxunto dos datos oficiais coñecidos ata o momento.

Non son meras estatísticas, porque detrás de cada unha desas mortes hai unha familia desfeita. Detrás de cada unha desas mortes hai unha vida. Porque as mulleres non somos números. Temos nomes, apelidos, vida, familia e non podemos afacernos nin resignarnos a convivir con esta violencia que desafía os alicerces dun país democrático.

Os crimes machistas on perdas inasumibles nunha sociedade avanzada e moderna. Estamos ante unha cuestión de Estado, de saúde pública e un grave atentado aos Dereitos Humanos. Temos diante unha realidade innegable que nos interpela a todos e todas a unha acción firme

en prol da erradicación da violencia contra as mulleres e das actitudes sociais que a toleran, a xustifican, ou mesmo a banalizan. Debemos intensificar esforzos para combater o machismo e condenar todas as actitudes, prácticas e condutas que consenten e reproducen as violencias machistas.

Galicia foi pioneira a nivel lexislativo cando xa no ano 2007, a Lei galega para a prevención e tratamento integral da violencia de xénero ampliaba o concepto de violencia de xénero indo máis alá da relación de parella, e incluía na definición a violencia física, a violencia psicolóxica, a violencia económica, a violencia sexual, o acoso sexual e o tráfico de mulleres e nenas. E que nos últimos tempos, está a avanzar na tipificación doutras formas de violencia, como a violencia vicaria e a violencia dixital.

A lexislación española tivo importantes avances normativos chegando a contar cunha lexislación que é un referente para moitos países, e o Estado español foi o primeiro en acordar, en 2017, un Pacto de Estado contra a Violencia de Xénero. É tempo de que a sociedade tome conciencia e interiorice que, como dixo a Organización das Nacións Unidas, a violencia contra as mulleres é unha vulneración dos dereitos humanos que alcanza proporcións pandémicas.

Por iso, todos os grupos políticos aquí presentes unimos hoxe as nosas voces, como xa fixemos noutras ocasións, para manifestar a nosa repulsa cara todas as formas de violencia recollidas no Convenio de Istambul e sumámonos a todas as voces que claman por un futuro en igualdade e libre de violencias.

Por iso, todos os grupos aquí reunidos:

Adherímonos a esta Declaración, e apoiamos todas as voces que traballan por un futuro libre de violencias.

- Ratificamos o noso compromiso co Pacto de Estado contra a Violencia de Xénero e lembramos a necesidade de continuar avanzando no seu desenvolvemento. E reivindicamos o papel tan importante que xogan os concellos, neste caso o Concello de Santiago.
- Comprometémonos a seguir traballando na ruptura do silencio; e sensibilizando e concienciando á cidadanía do problema estrutural que para a nosa sociedade supón a violencia machista.
- Continuaremos con esa coordinación continua entre os diversos axentes sociais implicados na violencia contra as mulleres. Debemos mellorar a resposta institucional a todos os niveis, evitando o risco de vitimización secundaria e mellorando a confianza das vítimas.
- Demandaremos a utilización de todos os recursos que sexan necesarios na asistencia, axuda e protección das vítimas, e dos seus fillos e fillas.
- Seguiremos impulsando o debate social para que se considere a violencia de xénero un asunto público. Os concellos somos, a maioría das veces, o primeiro recurso e, en ocasións, o único do que dispoñen as mulleres en procura de reparo e denuncia da violencia que sofren.
- Seguiremos apostando pola formación de todo o persoal do Concello de Santiago coa aprobación do primeiro Plan de Igualdade do Persoal Municipal.
- Apoiaremos o V Plan de Igualdade Municipal 2022-2025, a comezar polo incremento nos próximos orzamentos dos recursos destinados ao CIM.
- Colaboraremos co movemento feminista compostelán na organización de actividades para a eliminación da violencia contra as mulleres.

Aínda que pareza obvio é o noso deber lembrar que as mulleres non desexamos ser vítimas, non desexamos ser valentes... Queremos ser, simplemente, libres.